

Adie MUBA

S alt Wartek und au d Uelistube,
dr Wurzegrave, Münchnerhof,
alli zämme sin verschwunde
für e „Gsunde düüfe Schlof,“.
Me baut dort aane Woonige,
Apartemanger sait me hüt,
vo dr Grössli hän sys Määss
wey ungefäär e Schwoobebüt.
Doch vom Prys här muess me sage,
bruchts e bitzeli a Gwönig,
sy koschtet aim im Daag fascht glychvyl
wey e Suite im Drey König.
Für Basel isch das zimmlig wichtig,
well me billige Woonruum suecht,
denn unsri Sozialempfänger
syge zimmlig guet betuecht.
Jetzt kumm y aber ab vom Thema,
es goot doch do um d Muschtermäss;
also wämmer no kurz luege:
Was schrybt denn jetzt Tamediapräss?

Nach 103 Joor hän sy gschriibe,
wird s'erschtmoll Gratsytritt gä,
do kunnt woorschyns dr Trump ko luege
glaubsch, dä losst sich das nit nä!
Au zum Kulturerb wird mes zelle,
ich main do kunnt e kain verby,
sälbscht dr schiefi Turm vo Pisa
ka gege sy nur Bauschutt sy.
Nur s Vermiete vo Apartma
laufft bestimmt total verschisse.
Liebi Muba „altes Haus“
mir wärde di bestimmt vermisse

Bsunders dä Stand für „Körperpflege“
vermiss ich nämlich schampar, ... weil,
dye hän aim klopf, massiert und griibe,
mit aim Wort gsait: „Ouw war das geil“!

Als Prevenzion für s gesunde Läbe
griegsch zum Entspanne Rösslistumpe.
Au d Schueh zum Byspyl diens dr putze
mit Schwumm und Fett und Wullelumpe.
Bsunders rächt vermiss ich Better,
waich und mollig schön zum Liige,
Ich bi mängmoll nach ere Wälle
an dr Mäss in so ains gstiige.
In d'Käswaje und in Klöpfer
ha ich mit aim Gnuss ihne bisse
liebi Muba „altes Haus“
scho numme das dyen mir vermissee !

Scho im Oktober het d BAZ gschriibe,
d Mäss dye däte sy ystampfe,
denn s ganze Personal dort inne
dät für dä Dömpingloon nümm krampfe.
Derniere syg im Februar
mit ganz spezielle Akzione:
d Ussteller griege rächt Prozänt,
gön sy in „d Schwoobebüt,, go woone?

Und jetz isch d Muba ganz verschwunde,
dr halbi Vorstand wird au go,
drum stimmts, dass denne alli Ratte
e sinkends Schiff dyen zerscht verloo.

Und was no in de Stärne stoot,
wyelang dass d'Muba-Herbschtmäss git.
Bevor mir Feyg-Nius use gän,
au Gwäggi-Waggis wüsses nit !

*D'Ladäärneusstellig isch vom Fasnachtsmändig z nacht, em
11. Merz bis am Fasnachtsmittwuch demorge, em 13. Merz
uff em Minschterplatz. Me kaa dert au die ganz Buschle
Zeedel, dr Rädäbäng und d'Blaggedde kaufe. Uff em
Kasäärneareal sin zer glyche Zyt d'Requisite und d'Wääge z
bschauen. Mir fraie ys uff iire Bsuech.*